

Ненэцие'' автономной округ' Вато

Ненэцие'' автономной округхана Нэрм' няна иленя  
толырто' тянэ ненэцие'' община'' серо тасламбава нямна Нэда Вато.

Ненэцие'' автономной округхы'  
депутат'' Собрания'  
( № 179 –дс 2008 похы сентябрь' 25  
толыркана ня''амвы)

1 статья. Тюку Ватохона падвы'' сер' Федеральной  
Законодательствохона таславы

- Ненэцие'' автономной округхана Нэрм' няна иленя толырто' тянэ  
хибяри'' община'' (тяхад - толырто' тянэ хибяри'' община'', община'') - тикы  
харто манзаяидо', переняс'' иламдо' нерня минрева, тыто я, тыто хадо'  
серота'' общинам' Надимдемби''. Тарця община тыто хадырць я, сенений  
илевам' лэтрамбава е''эмня Надимдебэй.

- Мядндер (переняс'') тикы харто манзаяидо', переняс'' иламдо'  
нерня минрева, тыто я, тыто хадо' серота'' общинам' Надимдемби''. Тарця  
община тыто хадырць я, сенений илевам' лэтрамбава е''эмня Надимдебэй,

- Нопой яхана пилибт иленя хибяри, переняс'' иламдо' нерня  
минрена, тыто я, тыто хадо' лэтрамбада еэмня Надимдебэй.

- Округхана Няхы поход илена'' Нани'' паҢг мэта хибяри''  
общинам' сертась мян''Ңа.

- Харто илевамдо' нерня минрена'' толырто' тянэ хибяри''  
сенений илевам нерня минрена'', культурамдо' тенена, нумд пунрэвамдо  
мэта.

2 статья. Ненэцие'' автономной округхана община'' серо минрена''  
толырто' тянэ ненэця'' общинам' сертамбава серка''на, манзараваха''на  
правовой основадо' тая, тарця'':

1. Российской Федерация' Конституция, федеральной Вато'',  
Российской Федерация' Нани'' танеда'' нормативной правовой акт'',  
Ненэцие'' автономной округ' Вато' Мэбц, тюку Вато, тамна Ненэцие''  
автономной округна Нани'' Вато'', нормативной правовой акт''.

2. Толырто' тынэ'' хибяри'' община'' манзарава сенений илм' мэ''махана тасламбидо'.

3 статья. Вато манзарава  
Ненэй Вато ныхымда Ненэцие'' автономной округхана манзарана'' общинаха' Нэдтамбида, хуний Ненэцие'' округхана манзара''.

4 статья. Толырто' тынэ' ненэця община'' Намгэ е''эмня сертабада''.

1. Невхы похот' иринато', нисянато' минревы манзай'' нерня минрева'' е''эмня, невхы по'' илевам' мэ''ма'' е''эмня, хари'' илесь' ям' сахарамбава е''эмня, хибярина манзая'' танева'' е''эмня; толырто' тынэ' ненэця'' культура, вада тю''у ми''ма е''эмня Надимдембада''.

5 статья. Толырто' тынэ' ненэцие'' община'' серм' пэртя'' ненэця'' Нобт ма''люрма, таславы серо' Нобкана тасламбава''.

Община манзарава федеральной законодательство' тотрев сертабада:

1). Общинахана манзарана'' хуркари манзай пэрпато' Нод, сянридо' Нэбта Нод'' Ватовна нито' хэвхана Ноб'' пирас'';

2). Манзаямда хусувэй хибя харта ватонда сер', Нобпирувна, харта таслахая пэрНамда.;

3). Намгэм' пэрмам', ханзер'' манзаравам' харто' таслабидо''.

4). Манзаямдо' хусувэйхана Нади.

6 статья. Толырто' тынэ' ненэцие'' община'' манзаям' пэрма''.

Толырто' тынэ' ненэцие'' общинахана манзарана'' хибяри'' Нопой харвабто' сян Нэрм' ненэцие'' илевахад' перена манзай сертаабто' серо''На''.

Община'' манзарава коммерческой нина Нэда манзаям' мэ''На''

Общинам'пэртя'' хибяри'' манзайдо' пэрмахана предпринимательской манзаям' минресь пир''Надо'.

7 статья. Нэрм' няна иленя'' толырто' тынэ' ненэцие'' община'' сертабава.

1. Федеральной законодательствовна няби округхы Вато' падар''мана толырто' тянё ненэця''община сертамби''.

2. Федеральной Законодательство' падар''мана хусувэй хибя, толырта тянё хибяриҢэ' толёда, 18 поданда панась, харта ватонда сер''общинахана манзара пиртада. Няхаркад' вата хибяри''общинам' нэсь мян''Ңа''.

3. Федеральной Законодательствовна общинахана манзарава хари'' ватоход' миҢа, Ңодь 18 пор' таняя, толырто' тянё ненэцяҢгат' перебнанд'. Общинахана манзарава''е''эмня хари''падар''падась тара, общинахана мале манзарана''хибяри''ма''лёва протоколхана падбата.

4. Федеральной Законодательствона пады: общинахана толырто' тянё ненэця' хавна Ңани' тэнз мэта хибяри''мэб''нандо' серо''Ңа Ңодь толырто' тянё ненэцие''манзаравахана манзарабнанда.

5. Общинахана манзараван' ниня харвана хибяри харта ватовнанда илевамда минреҢгуда.

6. Хусувэй община''печатьда танябнанда тара, яҢга таславы падарта таняб''нанда, ханяна общинандо' нювм' падвы ҢЭҢгу, символикада танеҢгу.

8 статья. Толырто' тянё ненэцие''нюртей ма''лёрмахана общинам' серта таслава

1.Федеральной законодательствавна общинам' сертабава, община Ңарка Вато' мэбц таслава, нермпэртядамдо' тэрабава, тарана''падар''таслава нюртей ма''лёрмаханандо' таслабҢгудо'. Гарця ма''лёян' хусувэй таняна иленя хибяри тобнанда серо''Ңа.

2. Толырто' тянё ненэця общинам' таслава сер' нямна ня''амвы падар' яханандо' манзарана''ервха' тэврамбада''.

9 статья. Толырто' тянё ненэцие''община сер''падарт' падбава

1. Федеральной законодательствовна толырто' тянё ненэця' община падаркана падбата тара.

2. Община Нермпэртя юридической ханяна манзаравамда харта харданда адрес' мэб''нанда серо''Ңа.

10 статья. Толырто' тянё ненэцие''община' харто' манзарава ватодо' таня

Федеральной законодательствовна толырто' тянё хибяри''община'мян''ма:

- 1) Государственной властьюхана, Үэсы Үэвахана манзарана хари Үэда серо тасламбавахана, судхана, Үани государственной, ниня государственной манзараваха''на, община серуда манэ''лабтабась, лэтабась пир''Үа.
- 2) Государственной няби муниципальной серо пэрць пир''Үа;
- 3) Государственной властью' няби Үэсы' Үэваха манзарана хари'' Үэда серо' тасламбава община' ня' хари'' ямдо' сахарамбава серка''на манзараҮгу'';
- 4) Община' манзаравам' ханярина вадецъ серо''Үа;
- 5) Государственной властьюха'' няби Үэсы' Үэваха манзарана хари'' Үэда серо' тасламбава'' община' манзарава е''эмня хари'' хэтувндам' тэвра тара;
- 6) Общинана иленя'' Үацекэхэ'' сенений илевам' тэврамба тара, тохолабась тара;
- 7) Хэбедея' я'' мание, лэтрамба тара;
- 8) Культурам' минрени мядо' Үани хибяри' ма''лэя сертаба тара;
- 9) Үани община' ня'' ассоциация' Үоб'' ма''ласъ пир''Үа''.
- 10) Харто' вадамдо', культурамдо', сенений илевамдо' сахарамбабто', лэтрамбабто' тара;
- 11) Законодательствовна' харто' ватомдо' минребто' тара.

11 статья. Толырто' тянэ ненэця'' община' Вато' Мэбц

1. Федеральной Законодательство' няби ненэй Ватом' таслабвахана толырто' тянэ ненэця'' Вато' Мэбцхана пады:

- 1). Үобнзер' иленя'', манзарана'' ненэця'' Үамгэ' е''эмня Үобкана манзара'', Үобт' ма''люрҮа'', Үамгэм' пэрҮа'';
- 2). Община' учредитель' Үоб'' мазаралва;
- 3). Община' нюм', ханяна мэвада;
- 4). Общинахана тарана Үавори'' ханяхад хомбава, ханзер'' мэ''ма;
- 5). Үобнзер'' ховыдо', недво''мыдо', сертавыдо' тярпава;
- 6). Сад''мы Үаводо' тасламбава;
- 7). Хусувэй община' хибяри тандаед' мэвахана, ниня тэворта еся серка''на, вэва сер'' тасламбавахана харта ватода таня;
- 8). Общинамдо' тал''махад танена Үаворидо' ханзер'' мэ''ма;
- 9). Община'' нермпэртя'' сававна манзарава, хусувэй тарана серо тасламбава, Үокаюм' Үэсы' тер'' ненэцие'' ватомна Үэда серо падбава;
- 10). Манзарава е''эмня тарана падар'' несэймдава, нядамбава;

11). Общинахана манзарана” сянмэвна Њобт’ ма”люрма;  
12). Общинам’ несэймдава, талбава;  
13). Община’ манзарана” хуркари манзаям’ сертава ватодо’ тая;   
14). Манзарана ненэцие” общинан’ пэрма, ха”аврава сер”;  
15). Хусувэй ненэця’ общинахана харта пирувнанда манзаи пэрма’ сер”;

б). Общинахана манзарана” вэва серото’ Њадимб”, ервото’ ня’ общинаханандо’ харто’ тасламбаЊгудо’;

17). Община” контрольно-ревизионной орган манзарава’ ёльць;

18). Законодательствовна серо”та Њани’ тарана” Њаво’.

2. Община’ Вато’ Мэбц несэймдавам’ вадець тара:

1). Тикы е”эмня несэймдабы Вато’ Мэбц, протоколамда Њэсы’ Њэвахана манзарана” хари” Њэда серо’ тасламбадаха’ ня”амвахад ирий’ пуд’ Њэдарамбада”;

2). Федеральной законодательствовна яханандо’ манзарана ервха” ханяна манзаравадо’ падаркана падвы тэврамбада.

12 статья. Њэрм’ толырто’ тянё ненэцие” общинаха”на мэва

1. Хусувэй хибяри, Њопой паЊгхад перена”, переняс” общинахана мэсь пир”Ња;

Общинахана хусувэй хибяри манзарась пир”Ња: Њэрм’ яхана Њахат” илена, 16 пода панвы, Њэрм’ няна иленя ненэцяЊэ толёда, ханена, мюсерта, ёртя.

Общинахана манзараван’ ниня’ харвана таяд хэсь пир”Ња.

Общинахад тарпвы хибяри паямда ня”амЊгу.

Общинам’ сертабава сер”, таяна манзарава”, общинам’ талва, таяхад тарпва сер” толырто’ тянё ненэцие” община’ Вато’ Мэбцхана таславы.

Њани’ я’ тер” хибяри” толырто’ тянё ненэцие” общинахана мэсь нидо’ пирас”, тикы поЊгана общинаха”, община’ ассоциацияха” есяхана нядаЊгось мян”Ња”.

2. толырто’ тянё ненэцие” хибяри” вато, мэбцо, Российской Федерация’ государственной власть субъект”, Њэсы’ Њэваха манзарана хари” Њэда серо’ тасламбада”, хуркари тэнз нядаЊгова, федеральной законодательство’ хавна я”ма”.

3. Общинахана мэна'' хибяри'' Государственной пенсионной нядангова Федеральной законодательствохона пады.

4. Государственной власть' ерв'', Нэсы' Нэвахана манзарана'' хари'' Нэда серо' тасламбада'', нянандо' манзарана'' ерв'' толырто' тянэ ненэцие'' общинахана манзаранаНэ' толёбто ни серос''.

13 статья. Толырто' тянэ ненэцие'' община'' манзаидо' минрена''

1. Федеральной законодательство' Ватовна толырто' тянэ ненэцие'' община'' манзаидо' минрена'':

1) Нобнзер'' минрена ма''лёвадо',

2) Община' манзаи тасламбада (совет) – ма''лёва' поНгана община' манзаи тасламби.

2. Община' Вато' Мэбцувна Нани' манзаям' тасламбава сер'' танявнда.

14 статья. Общинам' пэртя'' толырто' тянэ ненэцие'' Нобкана ма''лёва.

1. Федеральной законодательствовна общинам' пэртя'' ненэцие'' саць тарана серто' – Нобт' ма''люрма, серо тасламбава. Тараванда ёльцяНгана ма''люрта''. Ма''лёвандо' толыр'' община Вато' Мэбцхана пады.

2. Ма''лёвандо' мальНгана хибяри'' хусувэй тарана'' серо' Нобкана тасламбадо' федеральной законодательствохона, община' Вато' Мэбцхана пады.

15 статья. Община' манзаи тасламбада (совет)

1. Федеральной законодательствовна община' серо минренаНэ совет Нэвнда.

Община' нюм' Надимбава Вато' Мэбцхана пады.

Община' советхана манзаравнди' хибяри'' Нокававнандо' Нобнзер'' ма''лёваханандо' тэрабидо'.

Советханандо' сян'' хибяри'' манзаравам' община' Вато' Мэбцхана пады.

Совет' сян'' по'' манзаравам' федеральной законодательствовна община' Вато' Мэбцхана пады.

Федеральной законодательствовна община' советхана манзаравнди' Ёобкана ма'лёвандо' мальҠгана тэрабидо'. Пеляхадандо' Ёокаркавна ня'амвы сём' хибяри'' танияна манзараҠгу.

2. Община' серо ня'амбада хибяри'' федеральной законодательствовна тарця ватодо' тания:

1). Падарм' падвы ненэць', падвэмда тасла''махадандо', нямдо' общинан' падҠгудо'.

2). Российской Федерация' законодательствовна сяҠок'' хибяри'' договор''мана манзаравнда'', недбядо' сян' пир ҠЭҠгу таслаҠгудо'.

3). Община' нермпэртя табекови манэ''сарҠа.

3. Федеральной законодательствовна община' совет' манзарана'' община' Вато' Мэбцувна Ҡани'' несэй серо тасламба пир''Ҡа''.

16 статья. Толырто' тянё ненэцие'' община' нермпэртя манзая:

1. Федеральной законодательствовна совет нермбэртя манзаяда тарця:

1) община' совет' манзаям' тидхалемби;

2) совет' ма'лёва' поҠгана' тарана серу тасламби. Ёобнзер'' ма'лёвахана, совет' ма'лёвахана тасламбада серо нида манэ''сар;

3) община' Вато' Мэбцувна совет', Ҡарка ма'лёвам' ма'ламбавам' тасламби;

4) Ненэцие'' автономной округ' государственной власть' органха''на, Ҡэсы' Ҡэваха манзарана хари'' Ҡэда серо' тасламбада'' поҠгана' община' манзаравам' манэ''лабтамби.

2. Федеральной законодательство' ватовна община' совет' нермбэртя община' Вато' Мэбцувна Ҡани серо тасламба пир''Ҡа.

17 статья. Я' ниня' Ҡэда'' Ҡавори'' ханзер'' мэ''ма

1. Федеральной законодательство' няби Ненэцие'' автономной округ' вато''омна толырто' тянё ненэцие'' общинахана мэна'' хибяри'' харто' илеваханандо' тарана серодо' мэць мян''Ҡа,

2. Российской Федерация Я' нямна таславы кодекс' 34 статьявна няби Ненэцие'' автономной округ' Ватовна общинандо' мэта я'' нямдо' мипда''.

Сенений сер''мана манзарана толырто' тянё ненэцие'' община манзаяханандо' мэта ядамдо' нерня ня''амби''.

3. Общинахана сенений ватовна манзаранаха” ям’ самляҢг поход ваторкавна мипидо’.

18 статья. Толырто’ тянё ненэцие” община Ңаворидо’  
Федеральной законодательство’ ватовна толырто’ тянё ненэцие”  
общинахана тарця Ңавори” тая:

- 1) Община’ сертава’ мальҢгана ми”мы” Ңамгэри”;
- 2) Община’ еся;
- 3) Харто’ ивняндо’ мипэй” еся”;
- 4) Федеральной законодательствовна таславы’ ня”амвы” Ңамгэри”.

19 статья. Толырто’ тянё ненэцие” община я”, тыто’ хадырма” я”  
Манзарана’ ватовна манзаянандо’ мэ”эмда община’ я”, тыто’ хадорма”  
я” Ңадимзь мян”Ңа.

20 статья. Общинахана манзарана” Ненэцие” автономной округ’  
государственной власть’ орган’, Ңэсы’ Ңэваха манзарана хари” Ңэда серо’  
тасламбада” ня’ поудо’

1. Федеральной законодательствовна Ненэцие” автономной округ’  
государственной власть’ орган’, Ңэсы’ Ңэваха манзарана хари” Ңэда серо’  
тасламбада” община манзаравахана серто яҢгу. Тараб”нанда Ңарка’ ватовна,  
округ’ ватовна нядаҢгось мян”Ңа”.

2. Федеральной законодательствовна, Ненэцие” автономной округ’  
государственной власть’ орган” сенений илевам’ лэтрамбава е”эмня  
общинахана манзарани’ нядамбась пир”Ңа:

- 1) Хурка манзаям’ пэрмам’ падаркана падбась нядаҢгу”;
- 2) община’ манзай минревам’ теневава’ е”эмня хибяри”  
тохоламбава;
- 3) Сенений ватовна илевам’ минрена” хибяри” есяси’ тарана  
табековам’ ня”амби;
- 4) Община’ социально-экономической’ нядаҢговам’ ня”амвандо’  
е”эмня хуркари” танеда” конкурсха”на мэвандо’ пир.

21 статья. Толырто’ тянё ненэцие” община несэймдава

1. Федеральной законодательствовна толырто’ тянё ненэцие”  
община манзаравам’ несэймдавам’ хибяридо’ ма”лэйканандо’ тасламбидо’.  
Тарця серкана нокаюв’ хибяри” пеля’ сё” толамбада.

2. Несэймдавы община’ манзарава’ Федеральной  
законодательствона пады.



22 статья Толырто' тянэ ненэцие" община сусадамбава

1. Толырто' тянэ ненэцие" община сусадамбава федеральной законодательствохана пады:

1) Общинахана мэнахат 2/3 манзаранито' хэ'мяхад, общинахана мэна хибяри", нерня манзарась нибнандо' пирас";

2) Сенений илева' манзаям' пэрмамдо' ёльцесь;

3) Вато' Мэбцувна общинандо' серо нись тарем' пэрпато. Тикахана суд' ватовна община' манзая сусадамбада.

2. Нэсы' Нэваха манзарана хари" Нэда серо' тасламбадаха тарана юн' падарм' Нэдарамби": ся"ня община' сусадабэй, харта тахарабта, государственной регистрацияда' яНговы. Тарця сер" вато ирий пиркана ервха" Нэдаравнда.

23 статья Государственной власть' орган", Нэсы' Нэваха манзарана хари" Нэда серо' тасламбада" сертавы сер"кана хусаркова

Федеральной законодательствовна общинам' пэртя" судан' хусаркось пир"на, сяха' пыдо' серодо' государственной власть' орган", Нэсы' Нэваха манзарана хари" Нэда серо' тасламбада", Нарка" ерв" таську пэрьядо, тикы' нид' илебцандо' вомб', ерв" есям' салдабнандо' тара.

24 статья Пудана" таслава"

1. Ненэй Вато ю" яля' ваерась тарана падаркана Надимвмахаданда' ныхыда Надимда.

2. Ненэцие" автономной округ' Нарктан', Ненэцие" автономной округ' Администрациян' нормативно-правовой актадо' тюку Ватовна сертабнандо тараНгу.

Ненэцие" автономной округ'  
депутат" Собраниа' нермбэрта

Нуда ылы  
И.Е. Ледков

Ненэцие автономной округ'  
Администрация' Наркта

В.Н. Потапенко

Нярьяна Мар'  
2008 похы октябрь' 1 толыр"  
№ 58-ОВ'